

Semover, saltar ed acrobatica

111 saltunzs/as ed acrobats/as giuvens e pli vegls dall'entira Cadi sepresentan era uonn al publicum a Mustér. Las gruppas dils Movis han prest la grondezia d'avon la pandemia, il slontsch ei turnaus sill'entira lingua.

HANS HUONDER/FMR

Sco biaras autras organisaziuns han era ils Movis (Moviment e Sault) giu da sbatter duront la pandemia. Las restricziuns e lu era empau las temas dalla glied da quella malsogna, mo era biars malsauns, han reduciu marcantamein il diember da participontas e participonts. Quei ei semidau igl onn vargau e la menadra *Esther Hendry* da Mustér constatescha: «Finalmein havein nus puspei saviu far ils trenaments senza restricziuns pervia da corona. Il diember dils commembers ei puspei carschius e nus savein presentar coreografias da sault ed acrobatica che selaian veser.»

Dall'entira Cadi

Suenter dus onns d'abstinenza sin tribuna ein ils Movis sepresentai igl onn vargau. Enstagl da rodund 130 affons, giuvenils e carschi sco avon la pandemia, havevan 60 mussau igl emprendiu. Cun 111 participontas e participonts ellas differentas gruppas ein ils Movis uonn lu bunamein puspei sil nivel d'avon la pandemia: «Il plascher ed igl interess ein carschi. Nus savein puspei exercitar senza restricziuns e temas ed aschia selegrar sin nossas presentaziuns.» Sco quei che *Esther Hendry* di, ei quei era

reussiu grazia a pliras menadras novas, responsablas mintgamai per las singulas gruppas. Sco mintg'onn dapi la fundaziun dalla gruppas igl onn 2000, han las presentaziuns liug igl avrel. Ils Movis ein dapi igl onn vargau aschidadir ina secziun dall'Uniun da gimnastica Cadi.

Uonn era cun acrobatica

«La finamira principala da nosa purschida da sault, moviment e dall'acrobatica e gimnasti-

ca ei da promover la concentrasiun sco era la coordinaziun e motorica dil tgierp. El temps actual dalla digitalisaziun eis ei fetg impurtont da muentar tgierp ed olma en buna cumpignia», puntuescha *Esther Hendry* e di: «Moviment ei pir che mai el trend ed il spectrum social ei pli che dumandaus dapi la pandemia da corona.» D'impurtonza ei quei surtut era pil svilup dils affons e giuvenils. Ei vegn semuentau tenor musica da different stil, aschia che

pign e grond che deriva da Breil entochen Tujetsch, sa sedivertir. Las nov gruppas ch'ein da veser proximamein en halla Cons a Mustér han exercitau ils saults tenor coreografias individualas. Leutier vegn la gruppas da gimnastica d'acrobatica. En quella lavura *Anja Klittich Berther* da Segnas ensemen cun affons e carschi dall'Ucraina. «Quella famiglia enrihescha nus, seigi quei sin basa atletica, mo era empatica», di *Esther Hendry*. La gruppas ei dil reminent separticipada il december vargau ad ina concurrenza naziunala dalla gimnastica d'acrobatica a Wiesendangen.

Era musica indigena

Ina produziun tut speciala porchas la gruppas «Pro». Ella saulta tenor ina canzun cumponida d'*Anna Tuor* da Mustér. Lezza ei da veser ed udir live sin tribuna cun cant e musica al keyboard. Il toc «Strong» ha *Anna Tuor* cumponiu el rom da sia lavur da matura al gimnasi dalla claustra da Mustér. Quei toc ha ella era registrau en in studio ed alla presentaziun da sia lavur da matura ha ella era sunau e cantau avon in publicum pli grond. *Anja Klittich Berther* ch'ei responsabla per la gruppas «Pro» ei fascinada che

quella collaboraziun ei reussida:

«Cura ch'jeu ha udiu la canzun l'emprema ga, hai jeu survegniu pialgagina e sun stada fetg fascinada.» Suenter las treis presentaziuns da quest onn seporscha danovamein la caschun da star da cumpignia.

Las presentaziuns han liug venderdis, ils 31 da mars 2023 allas 20.00; sonda, igl 1. d'avrel 2023 allas 20.00 e dumengia, ils 2 d'avrel 2023 allas 14.00 en halla Cons a Mustér.



111 affons, giuvenils ni carschi ein da veser cun lur coreografias. FOTO MAD